

## ■ GLOSSA

# Discurs cun geniturs u/e educaturs

DA SILVIO CAMENISCH

**S**ignur Camenisch, guardai sez quant grossa! Ha mes semnader, jau na di betg tgenin, fatg tut endretg. Jau prest schlop, sche Vus lais m'avrel. Essan pir enavos dal shooting per mammas avant ch'ellas vegnan en pagliola, avain stuì curren tras la plievgia ascha, navair teddybär. Tup, che jau buf sco ina locomotiva, fatsch jau navidis a noss discurs. Normalmain na fatsch jau gea betg, savais silmain pertge, signur Camenisch. Mintga mument savess el vegnir, noss Bambin noss Benjamin. Mes ginocolog n'ha betg pudì betg savì betg vulì dir il precis mument, tup, pensais er?

**N**us lain nus favurissain la pagliola a chasa en in ravugl fitg fitg intimfamiliar. Fiss la terza, pia trilogia da pagliolas a chasa. Essan nus loschs surlonder, signur Camenisch. Ina trilogia è tuttina, sto jau dir sin tudestg, das höchste der Gefühle, era tar Vus en la literatura, betg? Mes um vegniss a prender noss filius or da l'instrucziun. Curra l'aua da la vaschia da las chommas giu èsi brunsina d'alarm! Nus na lain betg che noss figl, el vegn tar Vus en la terza, nossa figlia tar Vossa collega, co ha'la puspè num, schaz? en l'emprima, e



munchentassan l'event, quai schizunt en l'advent.

**S**tuain nus tirar giu quai dals dis da jocker u tge, stuain nus betg? Nus n'avain betg dubis ch'i faschess insatge. Wieso? Noss dus èn infurmad en las dumondas specificas, Sachfragen, avain nus cumprà la cofra didactica dal chantun da Basilea. Noss chantun davos ils set culms e set binaris ha puspè durmì! La cofra didactica, era ditg pli hop pli salop Sexkoffer, quella vegn! Ils meds d'alfabetisaziun en sis set cofras vegnan er, ma la cofra sexuala vegn er! È schon sin via avant Igis/Landquart cunter Purtenza u cunter Surselva, ed ella sa ferma sin dumonda, senz'auter.

**L**a scolasta veglia da Nossa figlia, ella va en l'imprima, vegn l'auter onn en la segunda, signur Camenisch, è schoccada

da vulair prender or ella durant la naschientscha da chasa. Jau sun schoccada!, ha'la ditg sin dumonda. Chapin nus betg. La pitschna less vesair en natura co ch'il fritg daventà uman vegn qua sutor tar mai. Co ch'i vegn or da la batschida dals buns meds didactics or da la cofra d'alfabetisaziun sexuala conuschan noss dus. Noss dus han er schon dastgà guardar datiers la concepziun, die Empfängnis, manegel co che mes um m'ha cuvri. En noss quartier nov n'è quai betg pli in novum.

**L**'uvestgieu sa dosta vement cunter buns meds didactics da plisch per l'alfabetisaziun sexuala. Plüsch è reservà dapi ils Borgia unicamain al clerus, betg a las scolastas. Han las piunieras las pugnieras da l'emprima ura era betg dumandà il clerus, maindir la basa! Nus hajan endretg, nus hajan il dretg da tirar en temp liber per l'event interfamiliar, conferman amis dal conturn. Noss dus na perdan betg la schientscha per vesair datiers ina naschientscha. Ina naschientscha dastg'esser sangananta, sto betg ma dastga. Sch'i faschess insatge, i na fa nagut, avain nus psicologs avain nus traumatologs chantunals, èn er qua per insatge. Nu'è il problem?